

欽定古今圖書集成/博物彙編/藝術典/第 360卷



以2025年3月25日从维基文库导出



欽定古今圖書集成博物彙編藝術典

第三百六十卷目錄

醫部彙考三百四十

傷寒門六

朱肱活人書

太陽經脈證治 發汗和解之殊 寒傷營 風傷

衛 風見寒脈

寒見風脈 表證 發熱 惡寒 惡風 熱多寒少
下之而熱不退 頭疼 身疼 身

痒 無汗自汗 筋惕肉瞤頭眩身搖 喘 渴 鼻衄
汗出脅痛 煩躁 欬嗽 小便

數 畜血 嗜臥 發黃 陽明經脈證治 裏證 潮
熱讖狂 潮熱 自汗頭汗 但嗽

水不欲嚥 口燥咽乾 讖語 發狂 嘔 吐 欬逆
吐血 少陽經脈證治 往來寒

熱 發斑 陽毒 結胸 痞滿 咽喉痛 太陰經脈
證治 腹痛 腹脹滿 汗後寒熱

少陰經脈證治 吐利 下利 欬嗽 咽痛咽乾
衄血 煩躁 厥陰經脈證治 手

足逆冷 陰毒 吐長虫

藝術典第三百六十卷

醫部彙考三百四十醫部彙考 三百四十

傷寒門六傷寒門六

《宋朱肱活人書》

《宋朱肱活人書》

《太陽經脈證治》

《太陽經脈證治》

足太陽膀胱經，從目內眦上額，連於風府，分為四道，下項并正，別脈上下六道，以行於背，與身為經。「太陽之經為諸陽主氣，或中寒邪，必發熱而惡寒，緣頭項腰脊是太陽經所過處，今頭項痛，身體疼，腰脊強，其脈尺寸俱浮者，故知太陽經受病也。」

傷寒一二日，發熱惡寒，頭項痛，腰脊強，尺寸脈俱浮，此足太陽膀胱經受病也。太陽病，頭疼發熱，汗出惡風，宜桂枝湯，輕者只與柴胡桂枝湯。太陽病，頭疼發熱，無汗惡寒，宜麻黃湯，輕者只與桂枝麻黃各半湯。麻黃湯、桂枝湯，二者均為解散，正分陰陽，不可不慎也。仲景所謂「無汗不得服桂枝，有汗不得服麻黃。」常須識此。勿令誤也。今人纔見身熱頭痛便發汗，不知汗空閉而用麻黃，汗空疎而用桂枝。傷寒傷風，其治不同。古人有汗者當解肌，無汗者可發汗。

發汗和解之殊發汗和解之殊

傷寒表證，須看榮衛淺深，故仲景有正發汗湯劑，如麻黃湯、桂枝湯、大青龍湯是也。有和解其表，如小青龍湯、桂枝麻黃各半湯、白虎湯、桂枝二越婢一湯、柴胡桂枝湯、小柴胡湯之類是也。後人不能深究寒熱淺深，藥性緊慢，一概用藥，因茲夭殤。其間縱獲生全，往往汗後虛乏，遂致勞復，或變生百病，淹引歲月，卒至不救。此皆由汗下過度，陰陽並竭，血氣羸損，以致此禍。如遇病輕，但當和解之，所謂和其榮衛，以通津液，令其自解也。

寒傷營寒傷營

脈浮而緊澀，頭疼身體拘急，惡寒無汗，寒多熱少，面色慘而不舒，腰脊疼痛，手足指末微厥，不煩躁，此名「傷寒。」傷寒之候，發熱惡寒，頭疼腰脊痛，脈緊無汗，宜發汗而解，麻黃湯主之。輕者只與桂枝麻黃各半

湯。又人參順氣散、葱豉湯、蒼朮散、麻黃葛根湯，可選而用之。

然太陽病亦有熱多寒少者，須仔細看脈與證也。熱多寒少不嘔，清便自可，宜桂枝麻黃各半湯。若脈浮者，雖熱多寒少，自可發汗。若脈弱者，無陽也，桂枝二越婢一湯主之。熱多寒少而尺脈遲者，榮氣不足，血少故也，先以小建中湯加黃芪最良。尺脈尚遲，再作一劑。

或太陽證宜汗，而其人適失血及下利，則頻頻與少桂枝湯，使體潤皜皜，連日當自解。假如淋家衄，血家法不可汗，亦可以小柴胡之類和解之。

風傷衛風傷衛

脈浮而緩，寸大而尺弱，自汗體熱，頭疼惡風，熱多寒少，其面光不慘，煩躁手足不冷，此名傷風也。傷風之候，頭疼發熱，脈緩，汗出惡風，當須解肌，宜桂枝湯主之。輕者只與柴胡桂枝湯、敗毒散、獨活散，可選用之。治太陽中風，有汗用桂枝湯。

凡脈緊必無汗。惟濡而緊卻有汗。勿誤用小建中湯。須是脈浮而緩者。方可用桂枝。

項背強者。桂枝湯加葛根也。

《本草》葛根主傷風有濕，開竅解肌。蓋桂枝加葛根者。謂中風有濕當加之。去其風濕。取微汗者。風濕去也。

裏寒者，桂枝去芍藥加附子湯也。

不飲水者是也

凡發汗後，汗不止為漏風，桂枝加附子湯主之。腹滿者，太陰證，脈浮者，可服桂枝湯微發汗。腹痛者，桂枝加芍藥湯；痛甚者，桂枝加大黃湯也。雖然，桂枝湯自西北二方居人，四時行之，無不應驗。自江淮間唯冬及春初可行，自春末及夏至已前，桂枝證可加黃芩半兩。

陽旦湯是也

夏至後有桂枝證，可加知母一兩，石膏二兩，或加升麻半兩。若病人素虛寒者，正用古方，不在加減也。

岐伯所謂同病異治者此也。大抵用溫藥當避春，用熱藥當避夏，《素問》所謂用溫遠溫，用熱遠熱者也。

問：傷寒與傷風，何以別之？答曰：「傷寒者，脈緊而澀；傷風者，脈浮而緩。傷寒者，無汗脈澀；傷風者，有汗，脈緩故也。傷寒者，畏寒不畏風；傷風者，畏風不畏寒。大抵太陽病者，必脈浮發熱，惡風惡寒也。惡寒者，不當風而自憎寒；惡風者，當風而憎寒也。《六經》皆有傷寒傷風，其證各異。太陽脈浮有汗，為中風；脈緊無汗，為傷寒。陽明善饑為中風，不食為傷寒。少陽兩耳聾、目赤，胸滿而煩，為中風；口苦咽乾、目眩為傷寒。若三陰傷風，無變異形證，但四肢煩疼。餘證同《三陽》。

《風見寒脈寒見風脈》

《風見寒脈寒見風脈》

有發熱惡寒，煩躁，手足溫而脈反浮緊者；有寒多熱少，不煩躁，手足微冷，而脈反浮緩者，此名傷風見寒脈，傷寒見風脈也。蓋發熱惡風，煩躁，手足溫，為中風候；脈浮緊，為傷寒脈，是中風見寒脈也；寒多熱少，不煩躁，手足微厥，為傷寒候；脈浮緩，為中風脈，是傷寒見風脈也。中風見寒脈，傷寒見風脈，宜服大青龍湯。蓋大青龍證。脈似桂枝反無汗。病似麻黃反煩躁是也。

脈弱有汗，為桂枝證。脈緊不煩躁，為麻黃證。

大青龍湯治病，與麻黃湯證相似，但病尤重而又加煩躁者，用大青龍湯也。以其中風并傷寒俱盛，故青龍湯添麻黃作六兩，又似合桂枝湯藥味在內，添石膏所以為緊。此治榮衛俱病，若證不審，誤用大青龍湯，則發汗多傷人。

以其有煩躁一證，故可用大青龍湯。

「大抵感外風者為傷風；感寒冷者，為傷寒。」故「風則傷衛，寒則傷榮。」桂枝主傷衛，麻黃主傷榮，大青龍主榮衛俱傷故也。

風傷衛者，病在皮膚之間也，以衛行脈外為陽，主外皮膚之間，衛氣之道路，故其病淺；寒傷榮者，寒氣中於肌肉也，以榮行脈中為陰，主內肌肉之間，榮氣之道路，故其病深。所以桂枝與麻黃，所施各異，戒勿誤用，以有淺深之別。風寒之殊，醫者當宜審諦，

大青龍尤宜慎用。仲景云：「脈微弱，汗出惡風者，不可服青龍」，服之則厥逆，筋惕肉瞤，此為逆也。《類纂》云：「凡發汗過多，筋惕肉瞤，振搖動人，或虛羸之人，微汗出，便有此證，俱宜服真武湯以救之。羸甚者，芍藥或量多少與之。惡熱藥者，去附子，餘依加減法。」仲景製真武湯，乃為合用桂枝，卻用麻黃之類。發汗多亡陽有此證，故用真武湯。若調理順者，無此證也。

《表證》

《表證》

「發熱惡寒，身體痛而脈浮者」，表證也。

浮，表陽也，其脈按之不足，舉之有餘。《素問》云：「寸口脈浮而盛，曰病在外；寸口脈沉而緊，曰病在中。」仲景云：「脈浮者，病在表，可發汗。」又曰：「表有病者，脈當浮。」又曰：「結胸證，脈浮者，不可下。」則知脈浮者，表證也。

表證者，惡寒是也。惡寒者，表之虛，此屬太陽，宜汗之。然傷寒發表，須當隨病輕重而汗之，故仲景有發汗者，有和解之者，兼四時發汗，亦自不同。

發熱發熱

發熱而惡寒者，屬太陽也。

太陽病，必發熱而惡寒。蓋太陽主氣，以溫皮膚分肉，寒氣留於外，皮膚緻密，則寒慄而發熱。宜發其

汗，麻黃湯、大青龍湯主之。若發熱微惡寒者，柴胡桂枝湯、桂枝二越婢一湯主之。若吐利而發熱惡寒者，霍亂也。太陽病，發熱而渴，不惡寒，為溫病。若發汗已，身灼熱者，為風溫也。

又有太陽證，合用桂枝，卻用麻黃之類，發汗多，亡陽仍發熱者，真武湯主之。

太陽有潮熱乎。仲景大陷胸湯一證。結胸有潮熱者。為大結胸。屬太陽也。

大抵傷寒八日已上，大發熱者，此為難治。

仲景云：「脈陰陽俱虛，熱不止者死。」

又有醫人多用圓子藥下之，身熱不去，微煩者，梔子乾薑湯主之。傷寒五六日，大下之後，身熱不去，心中結痛者，未欲解也，梔子豉湯主之。

若傷寒得汗後，病解虛羸，微熱不去，可行竹葉石膏湯，隨其虛實而治之。

惡寒惡寒

大抵太陽病，必發熱而惡寒，惡寒家慎不可過，當覆衣被及近火氣，寒熱相薄，脈道沉伏，愈令病人寒不可遏，但去被徹火，兼飲以和表之藥，自然不惡寒矣。婦人惡寒，尤不可近火，寒氣入腹，血室結聚，鍼藥所不能治矣。

惡寒有二證：「發熱而惡寒者，發於陽也；無熱而惡寒者，發於陰也。發於陽者，宜解表，脈必浮數，屬桂枝湯、桂枝二越婢一湯、麻黃湯、青龍湯證也。」

「發汗後，反惡寒者，虛故也，屬芍藥甘草附子湯。脈微而惡寒者，此陰陽俱虛也，不可更吐下也。發汗面色赤，有熱者，為欲解，宜桂枝麻黃各半湯。」「傷寒大下後，復發其汗，心下痞，惡寒者，表未解也，不可攻其痞，當先解表，表解乃可攻痞，解表宜桂枝湯，攻痞宜大黃黃連瀉心湯。」雖然，太陽陽明少陰皆有惡寒，要之太陽病。或已發熱。或未發熱。必惡寒也。

問：「有汗出惡寒者，有汗出多而微惡寒者，有頭汗出而微惡寒者，何也？」答曰：「仲景云：『太陽病，其人發熱汗出，復惡寒不嘔，但心下痞者，此以醫下之也。心下痞，而復惡寒汗出者，附子瀉心湯主之。陽明病，脈遲，汗出多，微惡寒者，表未解也，可發汗，宜桂枝湯也。頭汗出而微惡寒者，屬少陽，宜小柴胡湯也』。」

惡風惡風

惡風者。衛中四時之虛風。所以惡風也。其人當汗出而脈緩也。數與桂枝湯。桂枝加葛根湯。使遍體微潤。連日當自解矣。

又有太陽病，發汗多，亡陽，遂漏不止，衛虛而惡風者，當溫其經也。其人惡風，小便難，四肢微急，難以屈伸者，桂枝加附子也。

風濕相薄。骨節疼煩。掣痛不得屈伸。汗出短氣。小便不利。惡風不欲去衣。或身微腫者。甘草附子湯主之。

熱多寒少熱多寒少

太陽熱多寒少有三證：有熱多寒少而不嘔，清便自可者；有熱多寒少而脈微弱者，有熱多寒少而尺脈遲者，其用藥皆不同也。

太陽病八九日。如瘧狀。熱多寒少，不嘔。清便自可。宜桂枝麻黃各半湯。

熱多寒少。而脈都大微弱者。無陽也。不可發汗。宜桂枝二越婢一湯主之。

若脈浮。雖熱多寒少。亦自可發汗也。

熱多寒少，而尺中遲者，血少也，先以小建中加黃芪以養其血。尺尚遲，再作一劑，然後晬時用小柴胡湯、桂枝二越婢一湯輩，小劑隨證治之。

大抵傷寒寒多易治，熱多難愈。傷寒發熱者，以其寒極則生熱，治法多用冷藥，故令熱不去。仲景熱多寒少，用桂枝二越婢一湯不渴，外有微熱者，用小柴胡加桂湯，皆溫表之義也。近時多用小柴胡湯，不問陰陽表裏，凡傷寒家皆令服之。此藥差寒，不可輕用。雖不若大柴胡湯、小承氣湯之緊，然藥病不相主，其為害一也。往往因服小柴胡湯而成陰證者甚多。仲景雖云傷寒、中風有柴胡證，但見一證便是，不必悉具。此為是少陽證，當服小柴胡，不必少陽證悉具耳。況本方又有

加減，隨證增損，古人方治審諦如此，後人妄投，良可怪也。

《傷寒》太陽證，發熱惡寒，宜發其汗。然熱多寒少，其脈微弱，或尺脈遲者，不可表也。

下之而熱不退下之而熱不退

仲景云：「病人脈微而瀋，為醫所病，大發其汗，使陽氣微，又大下之，使陰氣弱，其人亡血，病當惡寒，後乃發熱，無休止時。蓋陽微則惡寒，陰弱則發熱。陽微惡寒，四逆湯主之；陰弱發熱為內熱，葶藶苦酒湯主之。」

頭疼頭疼

頭疼者，陽證也。太陽證頭疼，必發熱惡寒，無汗者，麻黃湯；有汗者，桂枝湯。若已發汗，或未發汗，頭疼如破者，連鬚葱白湯。服湯不止者，葛根葱白湯主之。病人頭疼，鼻塞而煩者，何證也？此屬濕家，頭中寒濕，故鼻塞而頭疼也。內瓜蒂末鼻中則愈。

身疼身疼

太陽證，表未解，脈浮緊，法當身體痛，宜麻黃湯汗之。

脈浮緊，當身體疼痛，宜以汗解。假令尺脈遲者，不可發汗。何以知其然？榮氣不足，血少故也。尺脈遲者，先以小建中湯以養之。脈浮者，麻黃湯主之。

問：發汗後，身疼痛，脈沉而遲，當用何藥？答曰：
「仲景有桂枝加芍藥生薑人參新加湯，蓋為此證也。」
小建中湯兼治汗後身疼，脈沉而遲者。若霍亂吐瀉止，
而身疼痛不休者，少與桂枝湯即愈。《金匱要略》云：
「瘡家雖身體痛，不可發汗，汗出則瘥。」

身癢身癢

問：「身癢者何也？」答曰：「脈浮而遲，遲為無陽，
不能作汗，其身必癢。太陽病七八日，脈微而惡寒，以
陰陽俱虛，不可更發汗、更下、更吐也，小柴胡湯主
之。若反重發汗，則氣虛，必兩耳聾無聞。素無熱人，
可芍藥甘草附子湯；素有熱人，可黃芪建中湯。面赤有
熱者，未欲解也，以其不能得小汗出，身必當癢，宜桂
枝麻黃各半湯。」

無汗自汗無汗自汗

「《傷寒》連服湯劑而汗不出者，死。」如「中風法」
蒸之，溫熱之氣於外迎之，無不得汗也。

其法用薪火燒地，良久掃除去火，可以水洒之。取蠶
砂、柏葉、桃葉、糠麩，皆可用，相和鋪燒地上，可
側手厚上鋪席，令病人當上臥，溫覆之。夏月熱，只
布單覆之，汗移時立至。俟周身至腳心皆汗，皜皜乃
用溫粉撲止汗移上牀。最得力者，蠶沙，桃柏葉也。
無蠶沙亦得，單桃葉亦得。葫蘆亦可，用麩糠乃助添
令多爾，不用亦得。

傷寒亦有氣虛不能作汗者。仲景云：「脈浮而遲」，遲為無陽，不能作汗，其身必癢，宜桂枝麻黃各半湯主之。衛不和自汗，傷風自汗，亡陽自汗。

《別經》有汗無汗，俱載本篇中。

筋惕肉瞤頭眩身搖筋惕肉瞤頭眩身搖

太陽病，發汗不解，發熱心悸，頭眩身瞤動，欲擗地者，屬真武湯。大凡發汗過多，即身瞤動振搖，虛羸之人微發汗，便有此證，俱宜服「真武湯。」羸甚者，去芍藥，或少用之。有熱證惡熱藥者，去附子。餘依本方加減法詳之。

「傷寒，若吐若下後，心下逆滿，氣上衝胸，起則頭眩，脈沉緊，發汗則動經，身為振搖者，茯苓桂枝白朮甘草湯主之。」傷寒應發汗，而動氣在左，不可發汗。發汗則頭眩，汗出，筋惕，肉瞤，此為逆，難治，且先服防風白朮牡蠣散，次服建中湯。

喘喘

《傷寒》喘，只有太陽、陽明二證。

陽明喘正方載《陽明篇》中。

太陽病，頭疼發熱，身疼惡風，無汗而喘者，宜汗屬麻黃湯。

桂枝證，醫反下之，利遂不止，脈促者，表未解也。喘而汗出者，葛根黃芩黃連湯也。太陽病下之，微喘者，表未解故也，桂枝加厚朴杏子湯也。發汗後不可更行桂枝湯，若汗出而喘，無大熱者，可與麻黃杏子甘草石膏湯也。

又「發汗後。飲水多。欬而微喘者。水停心下。腎氣乘心故也。小青龍去麻黃加杏仁。小腹滿者。去麻黃加茯苓也。」

問：「麻黃主喘，何故去之？」答曰：「此治心下有水而喘，不留汗也。小便不利，小腹滿，故去麻黃加茯苓也。」

渴渴

脈浮而渴屬太陽。

陽明少陽少陰渴證，俱載《本經》篇中。

切戒太陽證無汗而渴者，不可與白虎湯。

問「太陽病渴。終不可與白虎耶。」答曰：「太陽證得汗後。脈洪大而渴者。方可與之也。」

凡病非大渴，不可與水。若小渴咽乾者，只小呷滋潤之，令胃中和。若大渴煩躁甚，能飲一斗者，與五升飲之。若全不與，則乾燥無由作汗，發喘而死。常人見因渴飲水得汗，小渴遂劇飲之，致停飲心下滿結喘死者甚眾，當以五苓散或陷胸丸與之。

《金匱》云：「得時氣至五六日而渴欲飲水不得多，不當與也。」何者？以腹中熱尚少，不能消之，便更為人作病矣。至七八日，大渴欲飲水，猶當依證與之，常令不足，勿極意也。凡人但見仲景云：得病反能飲水，此為欲愈，遂小渴者，乃強飲之，因成其禍，不可勝數。大抵！傷寒水氣，皆因飲水過多所致。水停心下，氣上乘心，則為悸，為喘，結於胸脅，則為水結胸。胃中虛冷，則為嘔，為噦。冷氣相薄，則為噎。上迫於肺則為欬。漬入腸中則為利；邪熱所薄，畜於下焦，則為小便不利，小腹滿，或裏急，溢於皮膚則為腫。

鼻衄鼻衄

傷寒太陽證，衄血者乃解，蓋陽氣重故也。仲景所謂「陽盛則衄。」若脈浮緊無汗，服麻黃湯不中病，其人發煩目暝，劇者必衄。小衄而脈尚浮緊者，宜再與麻黃湯也。衄後脈已微者，不可行麻黃湯也。若脈浮自汗，服桂枝湯不中病，桂枝證尚在，必頭疼甚而致衄。小衄而脈尚浮者，宜再與桂枝也。衄後脈已微者，不可行桂枝湯也。《大抵》，傷寒衄血，不可發汗者，為脈微故也。治法：「衄家不可發汗，汗出額上陷，脈緊急，直視不能瞬，不得眠，然而無汗而衄，脈尚浮緊者，須再與麻黃湯。有汗而衄，脈尚浮緩者，須再與桂枝湯。」

脈已微者，黃芩芍藥湯、犀角地黃湯。衄血不止者，茅花湯。若衄而渴心煩，飲則吐水，先服五苓散，次服竹葉湯。

汗出脅痛汗出脅痛

身涼汗出，兩脅疼痛，或乾嘔，此十棗湯證也。仲景云：「太陽中風，下利嘔逆，表解者，乃可攻之。」其人漉漉汗出，發作有時，頭痛，心中痞，鞭滿引脅下痛，乾嘔短氣汗出不惡寒者，此表解裏未和也，十棗湯主之。大抵 脅下痛者，此為有飲，須分表裏。乾嘔微利，發熱而欬，為表有水，小青龍湯加蕘花主之。身體涼，表證罷，乾嘔而脅下痛。為裏有水。十棗湯主之。十棗湯。非小青龍湯之比。須量人虛實。不可妄投。

煩躁煩躁

傷寒煩躁，太陽與少陰經為多。

蓋太陽與少陰為表裏

大抵陰氣少，陽氣勝，則熱而煩，故《太陽經》傷風，多煩而躁也。

陽虛陰盛。亦發煩躁。陽氣弱。為陰所乘而躁。故少陰病亦煩躁。學者當以外證與脈別之。

然有汗之而煩者。有下之而煩者。又有病已解而反微煩者。此由病新差。不勝穀。損穀則愈。

欬嗽欬嗽

傷寒太陽證，欬嗽，小青龍、小柴胡也。大抵熱在上焦，其人必飲水，水停心下，則肺為之浮。肺主於欬，

水氣乘之，故欬而微喘。仲景云：「傷寒表不解，心下有水，乾嘔發熱而欬，小青龍湯主之。」

小便不利。小腹滿者。去麻黃加茯苓。少陽少陰欬證。俱載《本經》篇中。

小便數小便數

「小便數者，何也？」曰：腎與膀胱俱虛，而有客熱乘之也。太陽、陽明二經既虛，致受於客熱，虛則不能制水，故令數小便。熱則水行澀，澀則小便不快，故令數起也。診其趺陽脈數，胃中熱，即消穀引飲，大便必鞭，小便即數也。太陽病，自汗，四肢拘急，難以屈伸，心煩，微惡寒，腳攣急，若小便數者，慎不可行桂枝也，宜與甘草乾薑湯、芍藥甘草湯也。大抵洩數則大便難。仲景云：趺陽脈浮而澀，浮則胃氣強，澀則小便數，浮澀相薄，大便則鞭，其脾為約，麻子仁丸主之。太陽病，若汗若吐若下後，微煩，小便數，大便因鞭者，與小承氣湯和之愈。又云：傷寒脈浮自汗，小便數，若胃中不和，讖語者，少與調胃承氣湯。

畜血畜血

太陽證，下焦有熱，小腹必滿，應小便不利，而小便反利者，下血證也，抵當湯主之。

嗜臥嗜臥

病人脈浮，頭項強痛而惡寒者，太陽證也。十日已去，脈浮細而嗜臥者，外已解也。設胸滿脅痛者，與小柴胡湯。脈但浮者，麻黃湯主之。

發黃發黃

太陽病，一身盡痛，發熱身如熏黃者何？曰：太陽中濕也。仲景云：傷寒發汗已，身目為黃，所以然者，以寒濕在裏不解故也，以為不可下也，於寒濕中求之。太陽中濕，一身盡痛，發熱身黃，小便不利，病人中濕，因而傷風，風濕相薄，一身痛重，是名風濕，當於風濕中求之。

「寒濕在裏不散，熱畜於脾胃，腠理不開，瘀熱與宿穀相薄，鬱蒸不消化，故發黃。」發黃與瘀血，外證及脈俱相似，但小便不利為黃，小便自利為瘀血。要之，發黃之人，心脾蘊積，發熱引飲，脈必浮滑而緊數。若瘀血證即如狂，大便必黑，此為異耳。凡病人身體發熱，頭面汗出，身無汗，齊頸而止，渴引水漿，小便不利，如此必發黃。茵陳蒿湯加五苓散也。

茵陳蒿湯十分。五苓散五分。三件拌和。每服一錢。溫水調下。日三服。

病人服湯，得小便利如皂莢汁赤，一宿腹減，則黃從小便中出也。古人云：「治濕不利小便」，非其治也。梔子蘘皮湯、麻黃連翹赤小豆湯，可選而用之。又方，傷寒欲發黃者，急用瓜蒂末，口含水嚙一字許，入鼻中，出黃水甚驗。即用茵陳蒿湯調五苓散服之，最良。大抵發黃者，瘀熱在裏，由小便不利而致之也。

以上「太陽經脈證」治也。

《陽明經脈證治》

《陽明經脈證治》

足陽明胃之經，從鼻起，俠於鼻，絡於目下咽，分為四道，并正別脈六道，上下行腹，綱維於身。蓋「諸陽在表，陽明主肌肉，絡於鼻。故病人身熱目疼、鼻乾不得臥，其脈尺寸俱長者，知陽明經受病也。」

問：「傷寒何以須診衝陽脈耶？」答曰：「衝陽穴是足陽明胃之經，人受氣於穀，穀入於胃，乃傳與五臟六腑，臟腑皆受氣於胃，其清者為榮，濁者為衛，榮行脈中，衛行脈外，陰陽相貫，如環無端。胃為水穀之海，主稟四時，皆以胃氣為本，是謂四時之變病，死生之要會。故傷寒必診衝陽，以察其胃之有無也。衝陽二穴，一名『會源』，在足跗上五寸，骨間動脈上，去陷骨三寸。傷寒二三日，身熱目疼，鼻乾，不得臥，尺寸脈俱長，此足陽明胃經受病也。傷寒二日，陽明經受病，可發其汗，非正陽明也。」

正陽明者，身熱汗出，不惡寒反惡熱，故可下也。

今言一二日傳陽明經，身熱目疼，鼻乾，不得臥，其脈俱長者，是太陽陽明，可表而已。若無汗，尚惡寒，宜升麻湯；有汗微惡寒者，表未解也，宜桂枝湯；無汗脈浮，其人喘者，與麻黃湯。

又問：「十二經皆一，而陽明有三，何也？有太陽陽明，有少陽陽明，有正陽陽明也。太陽陽明者，本太陽

病，若發汗、若下，若利小便，此亡津液，胃中乾燥，因轉屬陽明也。少陽陽明者，本傳到少陽，因發汗利小便已，胃中燥實，大便難也。正陽陽明者，病人本風盛氣實也。三陽明俱宜下，唯惡寒及中寒為病在經，與太陽合」病屬表，可發其汗。蓋太陽與陽明合病，脈必浮大而長，外證必頭疼腰痛，肌熱目痛、鼻乾也。脈浮大者，太陽也；長者，陽明也；頭疼腰痛者，太陽也；肌熱目痛鼻乾者，陽明也。尚惡寒者，可升麻湯汗之；若不惡寒反惡熱，大便不祕者，可白虎湯解利之；不惡寒反惡熱，大便祕，或讞語者，屬胃家實也，可調胃承氣湯下之。身熱汗出濺濺然者。屬陽明也。

《裏證》

《裏證》

不惡寒反惡熱，手掌心并腋下濺濺汗出，胃中乾涸，燥糞結聚，潮熱，大便鞭，小便如常，腹滿而喘，或讞語，脈沉而滑者，裏證也。裏證者，內熱是也。內熱者，裏之弱，此屬陽明也，宜下之。

《傷寒》始發熱惡寒，今汗後不惡寒，但倍發熱而躁。始脈浮大，今脈洪實，或沉細數。始惺靜，今狂語，此為胃實陽盛，再汗即死，須下之即愈。

發汗後不敢再表者，為脈沉實耳。脈若浮者，須再汗也。發汗後，不惡寒，只發熱，脈沉實，或狂語，此為胃實陽盛，即不可再汗也，須當下之。設令下後又不解表裏邪亦衰矣。

陽明證，頭疼不惡寒，反惡熱，胃實故也。陽明氣實，故攻頭也，調胃承氣湯主之。

病人無表裏證，發熱七八日，脈雖浮數，宜大柴胡湯下之。

大便祕者加大黃

亦有始得病便變陽盛之證。便須下之。不可拘以日數。

更有心胸連臍腹，大段痞悶腹中疼，坐臥不安，冒悶喘急極者，亦不候他證便下之。

凡大便祕妨悶，恐尚有表證者，亦須少少飲小承氣湯微解之，不可過多，令大泄也。

失下則氣血不通，四肢便厥。醫人不知，反疑是陰厥，復進熱藥，禍如反掌，不可不察也。

潮熱譫狂潮熱譫狂

仲景云：「傷寒若吐若下後不解，不大便五六日，上至十餘日，日晡所發潮熱，不惡寒，獨語如見鬼狀。若劇者，發則不識人，循衣摸牀，惕而不安，微喘直視，但發熱譫語者，大承氣湯主之。若一服利，則止後服。脈弦者生，澀者死。」

弦者陽也。澀者陰也。陽證見陰脈者死。病人有陽證而脈澀者。慎不可下。

下證悉具，服湯已，更衣者，止後服，不爾，盡劑服之，下後慎不中服補藥。孫真人云：「服大承氣湯得利差，慎不中服補藥也。」熱氣得補復成，更復下之，是重困也，宜消息安養之。

仲景有宜下者，有微和其胃氣者。蓋傷寒裏證，須看熱氣淺深，故仲景有宜下之，如大承氣湯、小承氣湯、十棗湯、大柴胡湯是也。有微和其胃氣，如調胃承氣湯、脾約圓少與小承氣微和之之類是也。《金匱》《玉函》云：「虛者十補勿一瀉，強實者瀉之，虛實等者，瀉勿大瀉之。」故王叔和序傷寒有承氣之戒。

又問：轉藥孰緊？答曰：「大承氣最緊，小承氣次之，調胃承氣湯又次之，大柴胡又次之。仲景治法，蕩滌熱積，皆用湯液，不得用圓子藥，不可不知也。」

大柴胡加大黃。小柴胡加芒硝。方為轉藥。蓋為病輕者設也。

潮熱潮熱

潮熱者，大率當下。仲景云：潮熱者，實也，大承氣湯證云：「其熱不潮，未可與也。」則知潮熱當下無疑矣。雖然，更看脈與外證，脈若弦若浮，及外證惡寒，猶有表證，且與小柴胡湯以解之。若腹大滿不通者，可與小承氣微和其胃氣，勿令大泄也。

仲景云：「日晡發熱者，屬陽明也。脈實者，大承氣、大柴胡也。脈虛者，桂枝也。」

縱使潮熱，當行大承氣，亦須先少與小承氣。若不轉失氣，不可攻之，後發熱復鞭者，大柴胡下之。若胸脅滿而嘔，日晡發潮熱者，小柴胡加芒硝主之。又有日晡發潮熱，已而微利者；又有微發潮熱而大便溏者，或潮熱而欬逆者，皆當用小柴胡也。

冬陽明潮熱，當行黃芩湯。

冬陽明病，脈浮而緊。必發潮熱，發作有時。但脈浮者，必盜汗。黃芩湯主之。

陽明病，汗出不惡寒，腹滿而喘，有潮熱者，宜下屬承氣湯。

陽明證，俱宜下，唯惡寒中寒為病在經，與太陽合病屬表，發其汗耳。若吐若下後，七八日不解，熱結在裏，表裏俱熱，時時惡寒者，白虎證也。

自汗頭汗自汗頭汗

陽明病自汗。

不惡寒反惡熱，濺濺然汗自出者，屬陽明也。

有汗而渴屬陽明。

陽明病，法多汗，而陽明亦有反無汗之證，不可不察也。

病人但頭汗出，身無汗，齊頸而還，小便不利，渴飲水漿者，此為瘀熱在裏，身必發黃，宜五苓散、茵陳湯。

陽明病下之，其外有熱，手足溫，不結胸，心中懊懣，饑不能食，但頭汗出者，梔子豉湯主之。

心下緊滿。無大熱。頭汗出者。茯苓湯主之。

陽明病，下血讖語者，為熱入血室，但頭汗出者，刺期門，隨其實而瀉之，汗出則愈。

汗出讖語者，有燥屎也，過經乃可下也。下之早，語言必亂，以表實裏虛故也。

陽明證，汗多而渴者，不可與五苓散。

汗多胃中燥。豬苓復利其小便故也。薏苡竹葉湯可與之。仲景云。陽明病發作有時。汗出多者。急下也。

問「陽明病渴，終不可與五苓耶？」答曰：「陽明證，小便不利，汗少脈浮而渴者方可。」皆仲景之妙法也。

仲景豬苓湯證亦云：「脈浮發熱，渴欲飲水，小便不利者，豬苓湯與之。」

「病人表實裏虛，元府不開，則陽氣上出，汗見於頭。」凡頭汗出者，五內乾枯，胞中空虛，津液少也，慎不可下，下之者，謂之重虛。然頭汗出者有數證：傷寒五六日，頭汗出，微惡寒，手足冷，心下滿，口不欲食，大便鞭，脈細者，此為陽微結，必有表復有裏也；脈沉，亦有裏也。汗出為陽微，假令純陰結，不得復有外證，悉入在裏，此為半在裏半在外也。脈雖沉緊，不得為少陰病。所以然者，陰不得有汗。今頭汗出，故知非少陰也。小柴胡湯主之。

《傷寒》五六日，已汗下，胸脅滿微結，小便不利，渴而不嘔，但頭汗出，往來寒熱，心煩者，此表未解也，柴胡桂枝乾薑湯主之。

但漱水不欲嚥但漱水不欲嚥

陽明證，頭疼身熱，口燥，但漱水不欲入咽者，必衄也。若病人無表證，不發寒熱，胸腹滿，脣燥，但欲漱水，不欲嚥者，此為有瘀血，必發狂也。輕者犀角地黃湯；甚者抵當湯。

口燥咽乾口燥咽乾

脾臟有熱，則津液枯少，故令口燥而舌乾。仲景云：傷寒無大熱，口燥渴而煩，背微惡寒者，白虎湯加人參。

讖語讖語

病人有讖語，有鄭聲二證。鄭聲為虛，當用溫藥白通湯主之。讖語為實，當須調胃承氣湯主之。服調胃承氣而讖語止，或更衣者，停後服，不爾再與之。仲景云：

「實則讖語，虛則鄭聲。」鄭，重也，重語也。世多不別，然讖語、鄭聲亦相似難辨，須更用外證與脈別之。若大小便利，手足冷，脈微細者，必鄭聲也。大便秘，小便赤，手足溫，脈洪數者，必讖語也。以此相參，然後用藥萬全矣。大抵傷寒不應發汗即讖語，讖語屬胃，和中則愈，不和則煩而躁，宜調胃承氣湯。然亦有三陽合病讖語者，有胃實讖語者；或發汗多，亡陽讖語者；有下利讖語者；有下後讖語者；有婦人熱入血室讖語

者。問：仲景云「無犯胃氣，何也？」答曰：熱因經水適來，乘虛入室，故血室有熱，遂令讖語，當以小柴胡解之，卻與胃實讖語不同，胃實有燥糞，故宜調胃承氣湯下之。若血實有熱，讖語非胃家實，仲景恐人作胃實攻之，故曰無犯胃氣也。大抵讖語是熱屬陽，而反見陰證者逆。

發狂發狂

發狂有二證：陽毒發狂，畜血如狂，其外證與脈皆不同。「病人煩躁，狂走妄言，面赤咽痛，脈實潮熱，獨語，如見鬼狀，此陽毒也。病人無表證，不發寒熱，唇燥但欲漱水，不欲入咽，其脈微而沉，小腹鞭滿，小便反利，大便必黑，身黃發狂，此血證諦也。」

病人如熱狀，煩滿口燥，其脈反無熱，此為陰伏其血證審矣。仲景云：太陽病不解，熱結膀胱，其人如狂，其血自下者愈。若外不解者，尚未可攻，當先解其表，宜桂枝湯。外已解，但小腹急結者，乃可攻之，屬桃仁承氣湯主之。

大抵傷寒當汗不汗，熱畜在裏，熱化為血，其人喜忘而如狂，血上逆則喜忘，血下畜則內爭，甚則抵當湯、抵當圓，輕者桃仁承氣湯、犀角地黃湯，須取盡黑物為效。

夫血熱畜在膀胱經。若用抵當湯。更須仔細審其。

有無表證。若有畜血證而外不解，亦未可使用抵當湯，先用桂枝湯以解其外。緣熱在膀胱太陽經故也。

又有火邪發驚狂者，醫以火於臥牀下，或周身用火，迫劫汗出，或熨而成火邪，其人亡陽，煩躁驚狂，臥起不安，「桂枝去芍藥加蜀漆牡蠣龍骨救逆湯，桂枝甘草龍骨牡蠣湯」主之。

凡灸及燒鍼後證似火。劫者並用。劫法治之。「《金匱》風引湯尤良。柴胡加龍骨牡蠣湯更捷。」

嘔嘔

無陽則厥，無陰則嘔。嘔者，足陽明胃之經，足陽明之氣下行，今厥而上行，故為氣逆，氣逆則嘔。仲景云：「嘔多雖不大便，不可下，可與小柴胡湯。」上焦得通，津液得下，胃氣相和，浹然汗出而解。大抵嘔證不一，各有治法，要之小柴胡湯尤相主當耳。與小柴胡湯，胸脅滿而嘔，日晡發潮熱者，可小柴胡湯加芒硝也。若嘔不止。心下急。鬱鬱微煩者。與大柴胡湯也。大便祕者。方加大黃。

大柴胡治嘔最妙，為內有枳實故也。枳實去穢壓虛氣，須是去大黃。仲景云：嘔多，雖有陽明病，慎不可下，《官局》桔梗湯最良，亦用枳實耳。

古人治嘔，多用半夏、生薑。孫真人云：「生薑是嘔家聖藥，仲景治嘔皆用之。」《金匱》治諸嘔吐穀不得下者，小半夏湯、小半夏加茯苓湯、小半夏加橘皮湯，皆可選用也。嘔而發熱者，小柴胡湯主之。嘔而發渴者，豬苓湯主之。先嘔卻渴者，此為欲解，急與之。先渴卻嘔者，為水停心下，此屬飲家。仲景云：「本渴飲水而嘔者，柴」胡不中與也，宜治膈間有水，赤茯苓湯主

之。若少陰證而嘔者，真武湯去附子加生薑也。若汗、若吐、若下後，虛煩不得眠，若嘔者，梔子生薑湯主之。傷寒差後嘔者，有餘熱在胃脘，竹葉湯加生薑主之。

問：「有乾嘔者何也？」答曰：大凡嘔者，飲食不下。乾嘔者，今人所謂哕也。或因汗出，或因有水，或因下利，脾胃有熱，故使乾嘔，官局中桔梗湯最佳。仲景治法，汗自出，乾嘔者，桂枝證也；表不解，心下有水氣，乾嘔發熱者，小青龍也；身涼汗出，兩脅痛，或乾嘔者，十棗湯也。少陰下利脈微，與白通湯；利不止，厥逆無脈，乾嘔煩者，白通加豬膽汁湯也。少陰下利，裏寒外熱，脈微欲絕，或乾嘔者，通脈四逆湯也。乾嘔吐涎沫，頭痛者，吳茱萸湯也。

若病人直患嘔吐，而復腳弱或疼，乃是腳氣，當作腳氣治之。

吐吐

吐有冷熱二證。寸口脈數，手心熱，煩渴而吐，以有熱在胃脘，五苓散主之。

傷寒有表證，渴欲飲水也。水入口即吐者，名曰「水逆」，由心經受熱，而小腸不利故也，宜服五苓散。發汗後，水藥不得入口為逆，若更發汗，必吐下不止，小半夏加茯苓湯、大半夏加橘皮湯主之。

「曾經汗下，關脈遲，胃中虛冷而吐，乾薑黃芩黃連人參湯主之。寒多不飲水而吐者，理中湯去朮加生薑主

之。少陰病，飲食入口則吐，心中溫溫欲吐，復不能吐，始得之，手足寒，脈弦遲者，此胸中實，不可下也，當吐之。若膈上有寒飲，乾嘔者，不可吐也，當溫之，宜四逆湯。吐利手足逆冷，煩躁甚者，吳茱萸湯主之。若傷寒解後。虛羸少氣。氣逆欲吐。竹葉石膏湯主之。

欬逆欬逆

傷寒欬逆，此證極惡，仲景經中不載。孫真人云：欬逆，遍尋方論，無此名稱深窮其狀，欬逆者，噦逆之名，蓋古人以欬逆為噦耳。大抵欬逆者，古人所謂噦是也；哕者，今人所謂乾嘔是也。《扁鵲中藏經》治傷寒欬逆丁香散：丁香、柿蒂各一分，甘草、良薑各半錢，沸湯點作一服，乘熱猛喫，極效。《三因》又有竹茹湯等方，亦丁香散方。竹茹湯治陽證也。

《本事方》治傷寒候欬逆豆蔻湯治陰證欬逆。丁香、茴香、肉豆蔻等藥，若陽證不可用。

凡欬逆，多有先熱而後喫生冷或涼藥，多相激而成。蓋陰陽二氣相搏。林人之僕，本發大熱，以涼藥下之，熱太甚，欬逆四五日，竟至於服丁香、柿蒂，而後卻再以小柴胡之屬解其餘熱，遂愈。

吐血吐血

傷寒吐血，由諸陽受邪，熱初在表，應發汗而不發汗，熱毒入深，結於五臟，內有瘀積，故吐血也。瘀血甚者，抵當圓；輕者，桃仁承氣湯，兼服犀角地黃湯、三

黃圓。假令已下，脈數不解，今熱則消穀善饑，至六七日不大便者，有瘀血也，抵當湯主之。

以上《陽明經脈證》治也。

《少陽經脈證治》

《少陽經脈證治》

足少陽膽之經，起目外眥，絡於耳，遂分為四道，下缺

盆，循於脅，并正別脈六道上下，主經營百節，流氣三部。故「病人胸脅痛而耳聾，或口苦咽乾，或往來寒熱

而嘔，其脈尺寸俱弦者，知少陽經受病也。」

「傷寒三四日，胸脅痛而耳聾，或口苦舌乾，或往來寒熱而嘔，其尺寸脈俱弦，此足少陽膽經受病也。太陽病不解，轉入少陽，脅下鞭滿，乾嘔不能食，往來寒熱，尚未可吐下，診其脈弦緊者，小柴胡湯主之。」蓋脈弦細，頭痛發熱，屬少陽。少陽受病，口苦咽乾，目眩，宜小柴胡湯以解表，不可發汗，發汗則讖語。讖語屬胃，胃和則愈。胃不和則煩而躁。宜調胃承氣湯。此屬少陽陽明也。

脈細頭疼，嘔而發熱者，屬少陽也，小柴胡湯主之。病人不渴，外有微熱者，小柴胡加桂枝也。

小柴胡加桂，主表熱最良。此法不特傷寒也。仲景云：「表有熱者，小柴胡加桂也；裏有熱者，白虎加

人參也。」大抵身熱不飲水者，為表熱也；口燥煩渴者，為裏熱也。二藥均治發熱，然分表裏，不可不知。

脈弦細。頭痛發熱者。屬少陽也。少陽不可發汗。小柴胡主之。

頭汗出而微惡寒者，屬少陽，宜小柴胡湯也。

假令病人心下滿，口不欲食，大便鞭，脈沉細，是裏證，當下。其人頭汗出，微惡寒，手足冷，卻當汗。此兩證俱見者，仲景所謂「半在裏半在表」也，小柴胡湯主之。病人脈弦，浮大而短氣，腹都滿，脅下及心痛，久按之氣不通，鼻乾，不得汗，嗜臥，一身及面目悉黃，小便難，有潮熱，時時欬嗽者，少陽中風也，小柴胡湯主之。若傷寒四五日。身熱惡風。頸項強。脅下滿。手足溫而渴者。小柴胡湯也。

往來寒熱往來寒熱

往來寒熱者，陰陽相勝也。陽不足則先寒後熱，陰不足則先熱後寒。然寒熱有三證，小柴胡湯、大柴胡湯、柴胡桂枝乾薑湯。有表證而往來寒熱者，用小柴胡也；有裏證而往來寒熱者，大柴胡也；已表或已下而往來寒熱者，皆可用柴胡桂枝乾薑湯也。仲景云：「血弱氣虛，腠理開，邪氣因入，與正氣分爭，往來寒熱，休作有時，小柴胡主之。」又云：「傷寒五六日中風，往來寒熱，胸脅苦滿，默默不欲食，心煩喜嘔，或胸煩而不嘔，或渴，或腹中痛，或脅下痞鞭，或心下悸，小便不利，或不渴，身有微熱，或欬者，小柴胡主之。傷寒十

餘日，熱結在裏，往來寒熱者，大柴胡主之。傷寒五六日，已發汗，復下之，胸脅滿，小便不利，渴而不嘔。頭汗出。往來寒熱。心煩。柴胡桂枝乾薑湯也。

往來寒熱。胸脅滿痛。或欬者。小柴胡湯主之。

《傷風》寒熱，或發熱惡風而渴，屬少陽。

發斑發疹

發斑有兩證：溫病發斑，熱病發斑。溫病發斑者，冬月觸冒寒毒，至春始發，或已汗下，表證未除，毒氣未解，故發斑，黑膏主之。或冬月溫暖，人感乖戾之氣，至春初為積寒所折，毒氣未得泄，迨天氣暄暖，溫毒始發，肌肉斑爛，癩疹如錦紋而欬，心悶嘔清汁，葛根橘皮湯屢用之驗。黃連橘皮湯亦佳。熱病發斑者，與時氣發斑同，或未汗下，或已汗下，熱毒不散，表虛裏實，熱毒乘虛出於皮膚，遂發斑瘡癩疹如錦紋，俗呼瘡痧，《素問》謂之胗。

發斑者，下之太早，熱氣乘虛故也；下之太遲，熱留胃中亦發斑，服熱藥過多亦發斑。微者赤斑出，五死一生；劇者黑斑出，十死一生。

大抵發斑不可用表藥，表虛裏實，若發汗開泄，更增斑爛也，皆當用化斑湯、元參升麻湯、阿膠大青湯、豬膽梔子湯，或與紫雪大妙。可下者與調胃承氣湯。

暑月陽氣重者，常宜體候，才有赤點如蚊蚤咬卻，急治之。

陽毒陽毒

傷寒病，若陽氣獨盛，陰氣暴絕，必發躁狂走妄言，面赤咽痛，身斑斑若錦文，或下利赤黃，脈洪實，或滑促者，此名陽毒也。宜用酸苦之藥，令陰氣復而大汗解矣。葶藶苦酒湯、陽毒升麻湯、大黃散、梔子仁湯、黑奴圓，可選而用之。

若陽毒倍常。躁盛大渴者。《黑奴圓》主之。

結胸結胸

夫結胸與痞，蓋以病發於陽，下之早，即為結胸；發於陰，下之早，即為痞。然結胸與痞相似，但以痛不痛為異耳。心下滿而鞭痛者，為結胸；但按之滿不痛者，為痞。醫家不審，一有差誤，立致危殆。結胸屬陷胸證，痞屬瀉心證，其詳各於逐門備論之矣。

「心下緊滿，按之石硬而痛，此名結胸」也。傷寒本無結胸，應身熱，下之早，熱氣乘虛而入，痞結不散，便成結胸。

若已誤轉了，初未成結胸者，急頻與理中湯服，自然解了，更不作結胸，蓋理中治中焦故也。此古人亦說不到，後因人消息得之。若大段轉損，有厥證者，兼與四逆湯便安。胃中雖和，傷寒未退者即候。

日數足可下。卻以承氣再下之。蓋前來下得。未是故也。

其證心下緊滿，按之石硬而痛，項強如柔瘥狀。

發熱汗出不惡寒，名曰「柔瘥。」

其脈寸口浮，關尺皆沉，或沉緊，名曰「結胸」也。治結胸，大率當下，然脈浮與大，皆不可下，下之則死，尚宜發汗也。

仲景云：「結胸脈浮者不可下，只可用小陷胸湯。」大抵脈浮是尚有表證，兼以小柴胡湯等先發表，表證罷，方用下結胸藥便安。

西晉崔行功云：「傷寒結胸欲絕，心膈高起，手不得近，用大陷胸湯皆不差者，此是下後虛逆，氣已不理，而毒復上攻，氣毒相薄，結於胸中，當用枳實理中圓，先理其氣，次療諸疾。」古今用之如神，應手而愈。

結胸有三種，有大結胸。

不按而痛。胸連臍腹堅硬。為大結胸。大陷胸丸主之。

有小結胸。

按之心下痛。為小結胸。小陷胸湯主之。

有水結在胸脅間。亦名「結胸。」

頭微汗出。但結胸。無大熱。此水結在胸脅證。小半夏加茯苓湯。小柴胡去棗加牡蠣主之。

又有寒熱二證，有實熱結胸。

胸中煩躁。心內懊懣。舌上燥渴。脈沉滑者。皆熱證也。大陷胸湯主之。

有寒實結胸。

寒實結胸，無熱證者，「三物白散、枳實理中丸主之。」

近世治結胸，多行「金鍼丸，用硫黃、陽起石者。若寒實結胸，行之或有差者；若熱實結胸，行之必死也。」問：「大陷胸湯與大陷胸丸如何？」曰：「大陷胸用甘遂太峻，不可輕用，須量虛實輕重，不得已，即大陷胸丸最穩。」問：「聖餅子灸臍中如何？」曰：「此尤不可用也。」

又云：「臟結無陽證，不往來寒熱，其人反靜，舌上胎滑者，不可攻也。二者病人脅下舊有痞，連在臍旁，痛引少腹，入陰筋者，亦名臟結，死不治。」

痞滿痞滿

問：「心下滿而不痛，此名痞也。傷寒本無痞，應身冷，醫反下之，遂成痞，枳實理中丸最良。」

仲景治痞氣，諸湯中，有生薑瀉心湯、半夏瀉心湯，二方平和，宜常用之。

仲景云：「滿而不痛者為痞，柴胡不中與也。半夏瀉心湯主之。」

此湯藥味。蓋本《理中》人參黃芩湯方也。

審知是痞，先用桔梗枳殼湯尤妙。緣桔梗枳殼行氣下膈，先用之無不驗也。結胸與痞，關脈須皆沉，若關脈浮者，大黃黃連黃芩瀉心湯主之。

「關浮則結熱。」三黃以瀉肝。

若復惡寒汗出者。附子瀉心湯主之。

病人心下痞，與瀉心湯，痞不解，發渴，口燥煩，小便不利者，五苓散主之。

「汗出，表解而胃中不和，心下痞鞭，乾噫食臭，脅下有水氣，腹中雷鳴，下利者，生薑瀉心湯主之。」下利日數十行，穀不化，腹中雷鳴，心下痞鞭而滿，此以醫下之也。若復下之，其痞益甚，甘草瀉心湯主之。蓋此非結熱，以胃中虛，客氣上逆，故使鞭也。下利而心下痞，服生薑瀉心湯，甘草瀉心湯，利不止者，當治其下焦，赤石脂禹餘糧湯主之。蓋生薑瀉心，甘草瀉心，皆治中焦。此利在下焦，若只治中焦，則利益甚耳。服赤石脂禹餘糧湯，利復不止，當利其小便，五苓散主之。凡痞，服瀉心湯不愈，然後可用陷胸丸下之。不可用陷胸湯，蓋太猛耳。

大抵結胸與痞皆應下，然表未解者，不可攻也。仲景云：「當先解表」，表解乃可攻痞。解表宜桂枝湯，攻

痞宜 大黃黃連瀉心湯。

外證未解，心下妨悶者，非痞也。謂之支結。柴胡桂枝湯主之。胸脅滿微結。小柴胡湯加乾薑牡蠣湯主之。

「若太陽證未除，而數下之，遂協熱而利，利不止，心下痞鞭，表裏不解者，桂枝人參湯主之。」十棗湯、大柴胡湯皆治心下痞。此方尤難用，須是表證罷，不惡寒身涼，其人熱熱汗出，發作有時，頭疼，心下痞鞭滿引脅下疼，乾嘔短氣者，乃可行。十棗湯，表未解者，慎不可用也。大柴胡湯治傷寒發熱，汗出不解，心下痞鞭，嘔吐而下利者，非大柴胡湯不可也。

若發汗吐下後，心下痞鞭，噫氣不除者，旋覆代赭湯主之。

有旋覆代赭湯證，其人或欬逆氣虛者，先服四逆湯。胃寒者，先服理中丸，次服旋覆代赭湯為良。

旋覆代赭湯是解後心下痞鞭證。

咽喉痛咽喉痛

咽喉痛，有陰陽二證：脈浮數，面赤斑斑如錦文，咽喉痛，唾膿血者，此陽毒也。

「少陰伏氣，亦有咽喉證，備《本經》篇中。」以上少陽經證脈治法也。

《太陰經脈證治》 《太陰經脈證治》

足太陰脾之經，為三陰之首。其脈布於脾胃。絡於嗌喉。故病人腹滿而嗌乾。尺寸俱沉細者。知太陰經受病也。

「傷寒四五日，腹滿咽乾，手足自溫，或自利不渴，或腹滿時痛，尺寸脈俱沉細，此足太陰脾經受病也。傷寒手足必微冷，若手足自溫者，繫太陰也。自利不渴，屬太陰也；腹滿時痛，屬太陰也。自利不渴者，臟寒也，當溫之，宜四逆湯、理中湯也。」腹滿脈浮者，可桂枝微發汗。腹痛者，桂枝加芍藥湯；痛甚者，桂枝加大黃湯。問：「古人以四日太陰證，病在胸膈，可吐而愈，何也？」答曰：「不然。有太陰證，脈大，胸滿多痰者，可吐之；脈大而無吐證者，可汗而已。大抵在表者汗之，在裏者下之，在上者湧之，在下者泄之。瓜蒂、梔、豉，隨證施用，不可拘以日數也。」

「胸膈不快，臍滿閉塞，脣青，手足冷，脈沉細，少情緒，或腹痛，此名太陰也。」近人多不識陰證，纔見胸膈不快，便投食藥，非其治也。大抵陰證者，由冷物傷脾胃，陰經受之也。主胸膈臍滿，面色及脣皆無色澤，手足冷，脈沉細少情緒，亦不因嗜慾，但內傷冷物，或損動胃氣，遂成陰證。復投巴豆之類，胸膈愈不快，或吐而利，經一二日。遂致不救。蓋不知寒中太陰也。太陰者脾之經也。

問：「萬一飲食不節，胸膈不快，寒中陰經，何法以治之？」答曰：「急作理中湯加青橘、陳橘，剉如麻豆大，服一二劑，胸膈即快。枳實理中圓、五積散。」

病有無熱惡寒者，發於陰也。發於陰者宜溫裏，脈必沉細，屬理中湯、四逆湯證也。若發熱微惡寒者，屬柴胡桂枝湯也。

太陰脾之經，主胸膈滿。《甲乙經》云：「邪生於陽者，得之風雨寒暑；邪中於陰者，得之飲食居處，陰陽喜怒。」又曰：「賊風虛邪者，陽受之；飲食不節，起居不時者，陰受之。陽受之則入腑，陰受之則入臟。入六腑則身熱不時，上為喘呼；入五臟則臍滿閉塞，下為殮泄，久為腸澀。」

腹痛腹痛

本太陽病。醫反下之。因爾腹滿時痛。是有表復有裏。仲景所以用桂枝加芍藥湯主之。痛甚者加大黃。

桂枝加芍藥。即是小建中也。太陰脈弱自利。設當行芍藥大黃者。宜減之。其人胃虛。陽氣易動故也。下利者。先煎芍藥十餘沸。

《難經》云：「痛為實。」大抵痛宜下。

腹痛有二證，有熱痛，有冷痛。尺脈弦，腸鳴泄利而痛者，冷痛也，小建中湯主之。仲景云：「陽脈濇，陰脈弦，法當腹中急痛，先與小建中湯，不差者，與小柴胡湯。」陰證腹痛，即四逆散、通脈四逆加芍藥湯。腹痛

小便不利者，真武湯。關脈實，腹滿，大便秘，按之而痛者，實痛也，桂枝加大黃湯、黃連湯、大承氣湯主之。

太陰大約可溫。然須有積證。方可下也。何謂積證。太陰腹滿時痛。

腹脹滿腹脹滿

腹脹滿者，陰陽不和也，桔梗半夏湯最良。仲景論太陽證，發汗後腹脹滿也，厚朴生薑半夏甘草人參湯。下後心煩腹滿，臥起不安者，梔子厚朴湯。吐後腹脹滿者，與調胃承氣湯。

汗後寒熱汗後寒熱

太陰證，發汗後，依前寒熱者，須看脈如何。若脈浮數或洪大，則表證猶在，當再表也，如桂枝湯或桂枝二、麻黃一之類。醫人為見已汗，或已下而發寒熱，不敢再表，誤矣。蓋脈浮為在表，表之必愈也。

《少陰經脈證治》

《少陰經脈證治》

足少陰腎之經，其脈起於小指之下，斜趨足心，別行者，入足跟中，上至股內後廉，貫腎絡膀胱，直行者，從腎上貫肝膈，入肺中，繫舌本。傷寒熱氣入於臟，流於少陰之經，少陰主腎，腎惡燥，故渴而引飲。又經發汗吐下已後，臟腑空虛，津液枯竭，腎有餘熱亦渴，故

病人口燥舌乾而渴。其脈尺寸俱沉者，知少陰經受病也。

問：傷寒何以須診太谿脈耶？答曰：太谿穴，是足少陰腎之經，男子以右腎為命門，女子以左腎為命門，主生死之要，病人有命門脈者活，無者死。仲景云：「少陰病，手足逆冷，發熱者不死，脈不至者，灸太谿七壯。」故傷寒必診太谿，以察其腎之盛衰也。太谿二穴，在足內踝後跟骨上動脈陷中。

問：「脈微細，欲吐不吐，心煩，但欲寐，五六日自利而渴。」答曰：「此名少陰也。」少陰之為病，欲吐不吐，心煩，但欲寐，五六日自利而渴者，虛故引水自救。若小便色白者，少陰病形悉具。小便白者，以下焦虛有寒，不能制水，故令色白也。四逆湯主之。

「少陰病，若口燥舌乾而渴者，須急下之，不可緩也，大承氣湯主之；若脈沉而遲者，須溫之，四逆湯主之。」蓋以日燥而渴者，知其熱；脈沉而遲者，別其寒也。

少陰屬腎，古人謂之腎傷寒也。腎傷寒口燥舌乾而渴，固當急下。大抵腎傷寒亦多表裏無熱，但苦煩憤，默默而極，不欲見光明，有時腹痛，其脈沉細。舊用四順湯，古人恨其熱不堪用，云腎病而體猶有熱者，可服仲景四逆散。若已十餘日，下利不止，手足徹冷，乃無熱候，可增損四順湯。

少陰病，若惡寒而踈，時時自煩，不欲厚衣者，用去大黃大柴胡湯。

少陰病，始得之，反發熱，脈沉者，麻黃細辛附子湯微汗之。

「少陰病，得之二三日，常見少陰無陽證者，亦須微發汗，宜麻黃附子甘草湯。」此學者不可不知也。

少陰腎之經，主脈微細，心煩，但欲寐，或自利而渴。問：《經》云「一二日少陰病者，何也？」謂初中病時，腠理寒，便入陰經，不經三陽也。

「傷寒雖是三陰三陽，大抵發於陽，則太陽也；發於陰，則少陰也。此二經為表裏，其受病最為多，陽明、太陰，受病頗稀，至於少陽、厥陰，肝膽之經，又加少焉。凡病一日至十二三日，太陽證不罷者，但治太陽」有元，得病便見少陰證者，直攻少陰，亦不必先自太陽次傳而至。

蓋寒氣入太陽。即發熱而惡寒。入少陰經。只惡寒而不發熱也。三陰中寒。微則理中湯稍厥。或中寒下利。即乾薑甘草湯。

手足指頭微寒冷。謂之清。此未消啖四逆。蓋疾輕故也。只可服理中、乾薑之類。

大段重者用四逆湯，無脈者用通脈四逆湯也。傷寒五六日，尺寸脈俱沉，或口燥舌乾而渴，或口中和而惡寒，此足少陰腎經受病也。少陰病，口燥舌乾者，急下之，宜大承氣湯。若不渴不口燥舌乾而脈沉者，急溫之，宜四逆湯。太陰厥陰俱不惡寒，只有少陰有惡寒之證，不可不知也。少陰病得之一二日，口中和，其「背惡寒

者，宜著灸，并服四逆湯也。」大抵傷寒陽明證宜下，少陰證宜溫。然仲景於少陰證口燥咽乾，即云急下之，蓋少陰主腎，繫舌本，傷寒熱氣入於臟，流於少陰之經，腎汁乾，咽絡焦，故口燥咽乾而渴，須宜急下之，非若陽明證宜下而可緩也。雖然，陽明亦有一證，發熱汗出多，急下之。陽明屬胃，汗多則胃汁乾。亦須急下也。

問：「仲景少陰四逆湯，又有四逆散，何也？」答曰：「大抵少陰病，不可使用熱藥。且如少陰病，亦有表熱者，仲景謂之晚發熱，用麻黃、細莘之類以發汗，終不成少陰證，便不得發汗耶？今少陰病，四肢冷，亦有內熱者，仲景用四逆散是也。四逆湯用附子、乾薑，而四逆散主四逆，其人或欬，或悸，或小便不利，或腹中痛，或泄利」下重。已上病皆熱證耳。

問：陰證有發熱者乎？答曰：「太陰厥陰，皆不發熱，只少陰發熱有二證，仲景謂之反發熱也。少陰病，初得之發熱脈沉者，麻黃細莘附子湯主之。」

少陰病，脈沉，發汗則動經，此大略之言耳。脈應裏而發熱在表，亦當以小辛之藥泄汗而溫散也。仲景云：傷寒之病，從風寒得之。表中風寒入裏則不消，須用溫藥少汗而解。

少陰病，下利清穀，裏寒外熱，手足厥冷，脈不出者，通脈四逆湯主之。大抵陰證發熱，終是不同。脈須沉，或下利手足厥也。病人尺寸脈俱沉細，但欲寐者，少陰證也，急作四逆湯復其陽，不可緩也。

少陰不得有汗。而少陰亦有反自汗出之證。

陰證四支逆冷，額上及手背冷汗濺濺者，亡陽也。

吐利吐利

嘔吐下利，仲景云：「傷寒發熱，汗出不解，心中痞鞭，嘔吐而下利者，大柴胡湯下之。」吐利汗出，發熱惡寒，四支拘急，手足厥冷者，四逆湯主之。「少陰病吐利，手足逆冷，煩躁欲死，吳茱萸湯主之。」吐利止而身體痛不休者，當消息和解其外，宜桂枝湯。

仲景《大柴胡一證》云：「傷寒發熱，汗出不解，心中痞，嘔吐而下利者，大柴胡主之」，此非霍亂也。

吐利已。汗出而厥。四支拘急不解。脈微欲絕者。通脈四逆加豬膽湯。自利而渴屬少陰。

傷寒熱入於臟，流於少陰之經，少陰主腎，腎惡燥，故渴而引飲。少陰下利，欬而嘔渴，豬苓湯主之。下利欲飲水者，以有熱也，白頭翁湯主之。

若「脈沉自利，而身體痛者，陰證也」，急當救裏，宜四逆湯、附子湯、真武湯之類以溫之。

「大抵大便利而身體疼者，當救裏；大便如常而身體痛者，急當救表。」此不可不知也。

少陰證，四逆而小便自利者，虛寒證也。四逆湯、真武湯去茯苓主之。

下利下利

傷寒下利多種，須辨識陰陽，勿令差互。

「三陽下利則身熱，太陰下利手足溫，少陰、厥陰下利身不熱」，以此別之。大抵下利挾太陽脈證，便不得用溫藥。俗醫但見下利，便作陰證，用溫熱藥，鮮不發黃生斑而死也。

大抵。傷寒下利，須看脈與外證。下利而脈大者，虛也，脈微弱者為自止。下利日十餘行，脈反實者逆。下利脈數而滑者，有宿食也，下之愈。脈遲而滑者，實也，其利未得便止，宜更下之。下利三部脈皆平，按其心下鞕者，急下之。協熱利者，臍下必熱，大便赤黃色，及腸間津汁垢膩。寒毒入胃，則臍下必寒，腹脹滿，大便或黃白，或青黑，或下利清穀。濕毒氣盛，則下利腹痛，大便如膿血，或如爛肉汁也。下利欲飲水者，以有熱也。下利讖語者，有燥屎也。寒毒入胃者，四逆湯、理中湯、白通湯加附子，四逆散加薤白主之。協熱利者，黃芩湯、白頭翁湯、三黃熟艾湯、薤白湯、赤石脂圓。濕毒下膿血者，桃花湯、地榆散、黃連阿膠散。雖然自利而渴屬少陰。然三陽下利亦有飲水者。乃有熱也。三陰下利宜溫之。然少陰自利清水心下痛。口乾燥者。卻宜下之。此又不可不知也。

少陰泄利下重，不可投熱藥，先濃煎薤白湯，內四逆散，緣四逆散用枳實芍藥之類。又尋常胃中不和，腹痛腸鳴下利，生薑瀉心湯最妙。此二法不特傷寒證也。

欬嗽欬嗽

有少陰證，欬嗽，真武湯、四逆散、豬苓湯也。大抵熱在上焦，其人必飲水，水停心下，則肺為之浮，肺主於欬，水氣乘之，故欬而微喘。

若少陰證，欬嗽，四支沉重疼痛，小便不利，自下利而欬，真武湯主之。

真武加五味子乾薑大抵傷寒水氣。皆因飲水過多。古人治水氣而欬者。病在陽。則小青龍湯主之。病在陰。則真武湯主之。

四支厥逆。腹中痛。或泄利而欬。四逆散主之。

四逆散加五味子、乾薑。

下利六七日。欬而嘔渴。心煩不得眠。豬苓湯主之。又《古今錄驗》。橘皮湯。治嗽佳。

咽痛咽乾咽痛咽乾

脈沉遲，手足厥冷，或吐利而咽中痛，此少陰證也。

《病源》云：此為下部脈都不至，陰陽隔絕，邪客於足少陰之絡，毒氣上衝，故咽喉不利，或痛而生瘡也。傷寒脈陰陽俱緊，反汗出者，亡陽也，此屬少陰，法當咽痛而復吐利，此候汗下熏熨俱不可。汗出者，藁本粉傅之。咽喉痛者，甘草湯、桔梗湯、豬膚湯、半夏散、通脈四逆去芍藥加桔梗湯。麻黃升麻湯。可選而用之。

又有伏氣之病，謂非時有暴寒中人，伏氣於少陰經，始不覺病，旬月乃發，脈微弱，法先咽痛，似傷寒，非喉痺之病，次必下利。始用半夏桂甘湯，次四逆散主之。此病只一二日便差，古方謂之「腎傷寒」也。

少陰大約可溫。然須有少陰口燥咽乾。或腹滿不大便。或下利清水。心下痛。皆積證也。

衄血衄血

問：「陰證有衄血者乎？」答曰：「陰證自無熱，何緣有衄？若少陰病，但厥無汗，強發之，必動血，未知從何道出，或從口鼻，或從耳目，是謂下厥上竭，為難治。」

煩躁煩躁

傷寒陰盛格陽者，病人身冷，脈細沉疾，煩躁而不飲水者是也。若欲引飲者非也。不欲飲水者，宜服「霹靂散」，須與躁止得睡，汗出即差。此藥通散寒氣，然後熱氣上行，汗出乃愈。火焰散、丹砂丸並主之。

傷寒陰證似陽者，陰發躁，熱發厥，物極則反也。大率以脈為主，諸數為熱，諸遲為寒，無如此最驗也。假令身體微熱，煩躁面赤，其脈沉而微者，皆陰證也。身微熱者，裏寒故也；煩躁者，陰盛故也；面戴陽者，下虛故也。若醫者不看脈，以虛陽上格之躁，誤以為實熱，反與涼藥，則氣消成大病矣。《外臺祕要》云：「陰盛發躁，名曰陰躁，欲坐井中，宜以熱藥治之。仲景少陰證，面赤者，《四逆》加葱白主之。」

以上《少陰經脈證》治也。

《厥陰經脈證治》

《厥陰經脈證治》

足厥陰肝之經。厥者，盡也。《靈樞》曰：「亥為左足之厥陰，戌為右足之厥陰。兩陰俱虛，故曰厥陰。」夫陰盡為晦，陰出為朔。厥陰者，以陰盡為義也。其脈循陰器而絡於舌本也。脈弗營則筋急，筋急則引舌與卵，故脣青舌卷而卵縮。凡病人煩滿而囊縮，其尺寸俱微緩者，知厥陰經受病也。

傷寒六七日，煩滿囊縮，其脈尺寸俱微緩，此足厥陰肝經受病也。厥陰病，其脈微浮為欲愈，不浮為未愈，宜小建中湯。脈浮緩者，必囊不縮，外證必發熱惡寒似瘧，為欲愈，宜桂枝麻黃各半湯。若尺寸脈俱沉短者，必是囊縮，毒氣入臟，宜承氣湯下之。

大抵傷寒病臟腑傳變，陽經先受病，故次第傳入陰經。以陽主生，故太陽水傳足陽明土，土傳足少陽木，為微邪也。陰主殺，故木傳足太陰土，土傳足少陰水，水傳足厥陰木，至六七日當傳厥陰，肝木必移氣剋於脾土，脾再受賊邪，則五臟六腑皆困而危殆，榮衛不通，耳聾囊縮，不知人而死矣。速用承氣湯下之，可保五死一生。古人云：「脾熱病則五臟危。」又云：「土敗木賊則死。」若第六七日傳厥陰，脈得微緩微浮，為脾胃脈也。故知脾氣全，不再受剋，邪無所容，否極泰來，榮衛將復，水升火降，則寒熱作而大汗解矣。

厥陰肝之經，主消渴，氣上衝，心中疼熱，饑不欲食，食則吐衄，下之利不止也。若陰氣獨盛，陽氣暴絕，則為陰毒。其證四肢逆冷，臍腹築痛，身如被杖，脈沉疾，或吐或利，當急灸臍下，服以辛熱之藥，令陽氣復而大汗解矣。古人云：「辛甘發散為陽」，謂桂枝、甘草、乾薑、附子之類，能復其陽氣也。微用辛甘，甚則用辛苦，陰極發躁。陰證似陽。學者當以脈別之。

手足逆冷手足逆冷

手足逆冷，此名厥也。厥者，逆也。陰陽不相順接，故手足逆冷也。陽氣衰，陰氣盛，陰勝於陽，故陽脈為之逆，不通於手足，所以逆冷也。《傷寒》熱多厥少者，其病當愈；厥多熱少者，其病為進。然有冷厥，有熱厥，當仔細辨認。

冷厥者，初得病日便四肢逆冷，脈沉微而不數，足多攣，臥而惡寒，或自引衣蓋覆不飲水，或下利清穀，或清便自調，或小便數。外證多惺惺而靜，脈雖沉實，按之遲而弱者，知其冷厥也。四逆湯、理中湯、通脈四逆湯、當歸四逆湯、當歸四逆加茱萸生薑湯、白通加豬膽湯，皆可選用也。

熱厥者，初中病必身熱頭痛，外別有陽證，至二三日，乃至四五日，方發厥。兼熱厥者，厥至半日卻身熱，蓋熱氣深則方能發厥，須在二三日後也。若微厥即發熱者，熱微故也。其脈雖沉伏，按之而滑，為裏有熱，其人或畏熱，或飲水，或揚手擲足，煩躁不得眠，大便秘，小便赤，外證多昏憤者，知其熱厥也，白虎湯、承氣湯隨證用之。仲景云：「傷寒一二日至四五日，厥者

必發熱。前熱者後必厥。厥深者熱亦深，厥微者熱亦微。」厥應下之，而反發汗者，必口傷爛赤。

熱厥當下。故云厥。應下之者。若反發汗。必口傷爛赤也。

又有下證悉具，而見「四逆」者，是失下後，血氣不通，四肢便厥，醫人不識，卻疑是陰厥，復進熱藥，禍如反掌。大抵熱厥須脈沉伏而滑，頭上有汗，其手雖冷，時復指爪溫，須使用承氣湯下之，不可拘忌也。

諸手足逆冷，皆屬厥陰，不可下，不可汗。然有須下，有須汗證者，謂手足雖逆冷，時有溫時，手足掌心必煖，非正厥逆也，當消息之。

若病人寒熱而厥，面色不澤，冒昧而兩手忽無脈，或一手無脈者，必是有正汗也。多用綿衣包手足，令溫煖，急服五味子湯，或兼與麻黃細辛甘草湯之類服之，啐時必大汗而解矣。

或傷寒厥逆而心下怔忡者，宜先治水，當服茯苓甘草湯，卻治厥。不爾，水漬入胃，必下利也。

又有病人手足厥冷，脈乍結者，邪氣結在胸也。心下滿而煩，饑不能食者，病在胸中，當吐之，宜瓜蒂散。蓋病在胸中，亦能令人手足厥，但認脈乍結者是也。

陰虛則結。脈來緩。時一止復來曰「結。」主胸滿煩躁。

若傷寒發厥，至七八日，膚冷而躁，無時暫安者，為臟厥。此為難治。

若厥陰證，大汗出，熱不去，內拘急，四肢疼，又下利，厥逆而惡寒者，四逆湯主之。

太陰、少陰經，從足至胸，俱不至頭。唯「厥陰經挾胃屬肝絡膽，循喉嚨，上頰顙，連目出額」，故太陰、少陰，並無頭疼之證，仲景只有厥陰一證。吳茱萸湯，治乾嘔吐涎，沫頭疼而已。大抵屬三陽者，頭疼為多也。

孫真人云：「陽傷寒者。體熱頭疼是也。陰傷寒者。不壯熱不頭痛是也。」

若非次頭疼，胸中滿，及發寒熱，脈緊而不大者，即是膈上有涎，宜用瓜蒂末一錢，煖水調下，吐涎立愈。夫重陽必陰，重陰必陽，寒暑之變也。假令手足逆冷，而大便祕，小便赤，或大便黑色，其脈沉而滑者，皆陽證似陰也。輕者白虎湯，甚者承氣湯。傷寒失下，血氣不通，令四肢逆冷，此是伏熱深，故厥亦深，速用大承氣加分劑下之。汗出立瘥。

仲景所謂「厥應下之」者此也。

熱厥與陰厥自不同。熱厥者。微厥即發熱。若陰厥即不發熱。四肢逆冷。惡寒。脈沉而細。大小便滑泄矣。

陰毒陰毒

手足逆冷，臍腹築痛，咽喉疼，嘔吐下利，身體如被杖或冷汗煩渴，脈細欲絕，此名陰毒也。陰毒之為病，初得病手足冷，背強，咽痛，糜粥不下，毒氣攻心，心腹痛，短氣，四肢厥逆，嘔吐下利，體如被杖，宜服陰毒甘草湯、白朮散、附子散、正陽散、肉桂散、回陽丹、返陰丹、天雄散、正元散、退陰散之類，可選用之。

大抵陰毒本因腎氣虛寒，或因冷物傷脾，外傷風寒，內既伏陰，外又感寒，或先感外寒而內伏陰，內外皆陰，則陽氣不守，遂發頭疼腰重、腹痛，眼睛疼，身體倦怠，四肢逆冷，額上手背冷汗不止，或多煩渴，精神恍惚，如有所失，「三二日間或可起行，不甚覺重，診之則六脈俱沉細而疾，尺部短小，寸口脈或大。」

六脈俱浮大，或沉取之。大而不甚疾者，非陰證也。大抵陽毒傷寒，其脈多弦而洪數。陰毒傷寒，其脈沉細而弦疾，不可不知也。

若誤服涼藥，則渴轉甚，躁轉急。有此病證者，便須急服辛熱之藥，一日或二日便安。

若陰毒漸深，其候沉重，四肢逆冷，腹痛轉甚，或咽喉不利，心下脹滿，結鞭躁渴，虛汗不止。

陽盛則身熱而無汗，陰盛則身冷而有汗。岐伯云：「陽勝則身熱，腠理閉，喘粗，為之俛仰，汗不出而熱。陰勝則身寒汗出，身常清，數慄而寒，寒則厥。」

或時鄭聲，指甲面色青黑，六脈沉細而疾，一息七至已來。有此證者，速於「氣海」或關元二穴，灸三二百壯，以手足和煖為效。仍兼服正陽散、肉桂散、回陽丹、返陰丹、天雄散、白朮散，內外通遂，令陽氣復而大汗解矣。

陰獨盛而陽氣暴絕。則為陰毒。若陽獨盛而陰氣暴絕。則為陽毒。大凡陰陽離絕。非大汗不能復其正氣也。

若陰毒已深。疾勢困重。六脈附骨取之方有。按之即無。一息八至已上。或不可數。至此則藥餌難為功矣。但於臍中用葱熨法。或灼艾三五百以來。手足不溫者。不可治也。如得手足溫。更服前熱藥以助之。若陰氣散。陽氣來。即減熱藥而調治之。

陽氣乍復。往往卻煩躁。慎不可投涼藥。煩躁甚者。再與返陰丹即定。當須識此。勿令誤也。

或身重背強，腹中絞痛，咽喉不利，身如被杖者，當作陰毒治之。

吐長虫吐長虫

此名虯厥也。虯厥者，臟寒，虯上入膈，其人吐虯也，此是厥陰證。或病人有寒，復發其汗，胃中冷，及因發汗後身熱，重發其汗，胃中虛冷，故長蟲逆上，先服理中圓，次用烏梅圓。

以上《厥陰經脈證》治也。。



本作品在全世界都属于**公有领域**，因为作者逝世已经超过100年，并且于1930年1月1日之前出版。



本作品原文沒有標點。標點是人工智能程序[古詩文斷句 v2.1](#)創建，並且經由維基文庫用戶編輯改善的。本站用戶之編輯以[知識共享 署名-相同方式共享 4.0协议 \(CC BY-SA 4.0\)](#) 發佈。



歡迎各位持續修正標點，請勿複製與本站[版權協議](#)不兼容的標點創作。

About this digital edition

This e-book comes from the online library [Wikisource](#)^[1]. This multilingual digital library, built by volunteers, is committed to developing a free accessible collection of publications of every kind: novels, poems, magazines, letters...

We distribute our books for free, starting from works not copyrighted or published under a free license. You are free to use our e-books for any purpose (including commercial exploitation), under the terms of the [Creative Commons Attribution-ShareAlike 3.0 Unported](#)^[2] license or, at your choice, those of the [GNU FDL](#)^[3].

Wikisource is constantly looking for new members. During the realization of this book, it's possible that we made some errors. You can report them at [this page](#)^[4].

The following users contributed to this book:

- Kwj2772
- Jdx
- 維基小霸王
- Rocket000
- Santoposmoderno
- HereToHelp

- Victormoz
- Srittau
- Boris23
- KABALINI
- Bromskloss
- Tene~commonswiki
- AzaToth
- Bender235
- PatríciaR
- Dbenbenn

-
1. [↑ https://wikisource.org](https://wikisource.org)
 2. [↑ https://www.creativecommons.org/licenses/by-sa/3.0](https://www.creativecommons.org/licenses/by-sa/3.0)
 3. [↑ https://www.gnu.org/copyleft/fdl.html](https://www.gnu.org/copyleft/fdl.html)
 4. [↑ https://wikisource.org/wiki/Wikisource:Scriptorium](https://wikisource.org/wiki/Wikisource:Scriptorium)